

Presentación

ANA DOROTEA TARRÍO TOBAR

Vicerreitora de Organización Académica

Antes de rematar a apertura das III Xornadas sobre Lingua e Usos, Lingua e Idade, quixera trasladarlles o saúdo do reitor, D. José María Barja, que non pode asistir a este acto, como era o seu desexo expreso, por ter que asistir a unha reunión de traballo en Santiago.

Para a Universidade da Coruña é unha satisfacción colaborar un ano máis, e xa van tres, coa Real Academia Galega (a quen queremos felicitar a través do seu presidente polo seu centenario e polo premio Fernández Latorre, que recibiu onte) na organización dunhas xornadas que serven de reflexión e análise, moi ao fío da vida cotiá e desde ópticas diferentes, sobre a situación do uso do galego na sociedade.

Nesta ocasión, o eixe do debate xira arredor do factor idade. A presenza de expertos na materia e de representantes de institucións con responsabilidades políticas directas en ámbitos nos que se entrecruzan grupos sociais de idade e usos do idioma, permitirannos, estou segura, facer unha radiografía do estado da cuestión e enfrontar as liñas de actuación que foren precisas.

O compromiso da Universidade da Coruña co idioma propio de Galicia vai máis alá do artigo dos Estatutos no que se lle outorga valor xurídico e institucional.

Non aceptamos o reduccionismo de reservar o uso do galego para os espazos rituais, para a liturxia académica, por máis que esta sexa simbolicamente importante e significativa.

Aínda que sabemos que o punto de partida é complexo, o equipo de goberno, do que me honro en formar parte como vicerreitora de Organización Académica, non aforrará enerxías para defender, nun traballo de longo alcance, a plena normalización do uso do galego nos ámbitos docente, investigador, laboral e administrativo.

Efectivamente, as enquisas de uso do galego por parte da mocidade universitaria bótannos diante dos ollos unha realidade preocupante perante a que non podemos quedar pasivos. Sen dúbida, a conferencia inaugural do profesor Anxo Lorenzo Suárez, da Universidade de Vigo, encadrará con rigor e precisión as propostas a debate nestes tres días de xornadas.

Seguros como estamos de que serán un éxito, emprazamos xa os organizadores a continuar e a pensar nas cuartas xornadas. Desde o equipo de goberno e a comunidade universitaria, benvidos a todos e a todas e que este encontro sexa frutífero e produtivo.

Moitas grazas.